

**BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
VLADA TUZLANSKOG KANTONA**



**PRINCIPI, CILJEVI I MJERE DJELOVANJA
VLADE TUZLANSKOG KANTONA
2022 – 2026**

EKSPOZE PREMIJERA

Tuzla, 22.3.2023. godine

Irfan Halilagić, dipl.pravnik

Poštovani gospodine Predsjedniče Skupštine Tuzlanskog kantona,

Poštovani zamjenici predsjednika Skupštine Tuzlanskog kantona,

Uvažene zastupnice i zastupnici, predstavnici medija, prisutni gosti

Poštovane dame i gospodo

Skupštinska većina i predsjednik Skupštine dodijelivši mi po drugi put mandat za sastav Vlade Tuzlanskog kantona učinili su mi veliku čast na čemu im ovom prilikom izražavam duboke izraze zahvalnosti. Danas, za razliku od 28. februara prošle godine, izraze zahvalnosti i prihvaćanje odgovornosti doživljavam mnogo emotivnije i ponosnije jer smatram da sam sa odabranim timom opravdao ukazano povjerenje. Zajedno sa prethodnim sazivom Vlade Tuzlanskog kantona uz punu podršku zastupnika koji su činili većinu u Skupštini Tuzlanskog kantona, a nerijetko i zastupnika iz opozicije, realizirao sam sve mjere iz tadašnjeg ekspozea. Bilo je malo vremena a puno mjera, čak njih osamnaest. Odabrani pristup, posvećenost, usmjerenost i timski rad doprinijeli su da realiziramo sve mjere, vodeći se stavom teže ćemo realizirati danas, a lakše ostaviti za kasnije. Stvorili smo povoljan ambijent za realizaciju navedenih ali i brojnih drugih mjera sinergijom ministara, zastupnika, službenika, namještenika, direktora i zaposlenika u javnim ustanovama i javnim preduzećima, predstavnika poslovne zajednice i nevladinih organizacija. Svima njima zajedno i pojedinačno iskazujem zahvalnost za dati doprinos.

S ponosom ću, i u ovoj prilici, spomenuti sve realizirane mjere:

- Materijalno-tehničko opremanje Ministarstva unutrašnjih poslova Tuzlanskog kantona, Civilne zaštite i Robnih rezervi u iznosu do petnaest miliona konvertibilnih maraka
- Stavljanje van snage odluke o povećanju plata i ostalih primanja izabranih zvaničnika (poslanika u Skupštini TK, Premijera, ministara u Vladi TK i savjetnika
- Donošenje izmjena i dopuna zakonske regulative, koje se odnose na porodiljske naknade majkama porodiljama (u iznosu od 1.000 KM), te povećanje dječijeg doplatka za 50%
- Povećanje plata svim radnicima u oblasti obrazovanja (osnovnog, srednjeg i visokog) u iznosu od 9,5%

- Povećanje boračke egzistencijalne naknade za demobilisane borce u iznosu od 20%
- Povećanje naknade za oboljele od celijakije, u skladu sa usvojenom skupštinskom inicijativom
- Izrada novih pedagoških standarda za osnovno i srednje obrazovanje te normativa i standarda visokog obrazovanja
- Nabavka besplatnih udžbenika za sve učenike od prvog do devetog razreda osnovne škole
- Stipendiranje posebno nadarenih učenika i studenata, (500.000 KM) sredstva pozicionirati kod Ministarstva za obrazovanje i
- Povećanje poticaja u poljoprivredi na deset miliona konvertibilnih maraka (10.000.000 KM)
- Povećanje sredstava za nerazvijene i manje razvijene opštine u iznosu od 50% u odnosu na planirana sredstva Budžeta za 2022.
- Usvajanje jednokratne pomoći penzionerima sa najnižom penzijom (izmjenama i dopunama Budžeta planirati sredstva u iznosu od 1.500.000 KM)
- Podrška povratničkoj populaciji, kako fizičkim licima tako i infrastrukturnim projektima (Izmjenama i dopunama Budžeta za 2022. godinu povećati sredstva u iznosu za 100
- Povećanje sredstava na budžetskim pozicijama za projekte iz oblasti kulture, sporta i mladih (Izmjenama i dopunama Budžeta za 2022. godinu povećati sredstva u iznosu za 20 %)
- Racionalizacija i smanjenje nameta u privredi, što se prije svega ogleda u ukidanju parafiskalnog nameta "naknade za opće korisne funkcije šuma".
- Pokretanje postupka za izradu projektne dokumentacije Kampusu Univerziteta u Tuzli kao preduslova za početak gradnje (Izmjenama i dopunama Budžeta za 2022. godinu planirati sredstva u iznosu za od 500 000 KM)
- Pokretanje postupka za uvođenja sistema elektronske prijave ispita na Univerzitetu u
- Hitno uvođenje elektronskih zdravstvenih knjižica za korisnike zdravstvenog osiguranja Tuzlanskog kantona.

Dame i gospodo,

U posljednjih dvanaest godina održana su tri izborna ciklusa za Skupštinu Tuzlanskog kantona, ali je nažalost, zbog političke nestabilnosti u našem Kantonu imenovano sedam Vlada i po prvi puta u navedenom periodu Tuzlanski kanton ima Vladu kontinuiteta.

Kontinuitet je volja birača, a mi je doživljavamo kao izraz zahvalnosti za učinjeno ali i obavezu da nastavimo u kontinuitetu kreirati povoljan ambijent za dostojanstvo života u Tuzlanskom kantonu.

U kontinuitetu ćemo nastaviti kreirati i provoditi politike zadržavanja stanovništva koje će rezultirati usporavanjem i zaustavljanjem trendova odlaska stanovništva a posebno mladih, dodatno ćemo osnažiti politike za poboljšanje statusa boračke populacije, socijalnih kategorija, zaposlenika u obrazovanju, zdravstvu, policiji i poticanju poljoprivrede.

Nikada nećemo izgubiti fokus i prestati brinuti o razvoju manje razvijenih općina svjesni važnosti ravnomjernog razvoja za kvalitet života i sigurnost građana Tuzlanskog kantona.

Ponosni na postignuća naših privrednika i svjesni da je privreda generator novih vrijednosti, novih radnih mjesta, novih inovacija u svim područjima, a posebno u suvremenim područjima digitalne transformacije i zelene tranzicije, nastaviti ćemo donositi politike poboljšanja poslovnog ambijenta i uvećavati sredstva za podršku razvojnim programima poslovnih subjekata.

U kontinuitetu ćemo djelovati kroz dva ključna principa - otvorenost i odgovornost. Sve što radimo, znat će se i nikada za naše djelovanje ili nedjelovanje nećemo činiti druge odgovornim. Nastavit ćemo štiti i provoditi principe socijalne kohezije, solidarnosti i ravnopravnosti.

I na kraju želim da sa ovog mjesta pošaljem jasnu i nedvosmislenu poruku vama ovdje prisutnima, građanima i građankama Tuzlanskog kantona da ćemo u kontinuitetu činiti sve što je do Vlade da promijenimo život građana na bolje, da Tuzlanski kanton učinimo boljim mjestom za život, u kojem će naša djeca i buduće generacije željeti da u njemu odrastaju, rade i ostaju.

Dame i gospodo, uvaženi poslanice i poslanici, cijenjeni gosti,

Naš kanton ima svoje specifičnosti koje ga čine posebnim i na kojima ćemo graditi politiku u narednom periodu, a to su brojnost, kreativnost i talent naših ljudi u kombinaciji sa raznovrsnim prirodnim bogatstvima.

Tuzlanski kanton bi zbog negativnih učinaka ranijih politika razdvajanja i sukobljavanja uskoro mogao izgubiti status „najmnogoljudnijeg kantona u Federaciji BiH“. Vjerujem da zajedno možemo stvoriti slobodno, kreativno i sigurno okruženje za kvalitetan život, odnosno sredinu koja ljude privlači, a ne tjera od sebe i tako zadržati status najmnogoljudnijeg kantona. Svako od nas može da doprinese, a naša Vlada će predvoditi ovaj proces.

Programske aktivnosti Vlada će temeljiti na zakonima i propisima koji se odnose na rad Vlade, pojedinih ministarstava, kantonalnih uprava i kantonalnih organizacija, ali i na važećim strateškim dokumentima koje je usvojila Skupština Tuzlanskog kantona u prethodnim godinama. Usvajanjem Strategije razvoja Tuzlanskog kantona za period 2021-2027. godina definirani su i usklađeni razvojni pravci i prioriteti Tuzlanskog kantona sa ključnim nacionalnim i međunarodnim razvojnim dokumentima. Do danas smo realizirali brojne aktivnosti mjera iz razvojne strategije i ostvarili značajna postignuća ispunjenja indikatora operativnih i strateških ciljeva.

Međutim, pred nama je još mnogo razvojnih izazova s kojima ćemo se suočiti u ovom mandatnom periodu. Svjesni doprinosa i značaja postignutog konsenzusa velikog broja sudionika u procesu izrade strateških dokumenata o najvažnijim strateškim usmjerenjima i mjerama za postizanje strateških ciljeva koji obavezno uključuju Vladu i Skupštinu kantona, i ovom mandatnom periodu nastaviti ćemo sa izradom sektorskih strategija u područjima turizma, obrazovanja, nauke i istraživanja, zdravstvene zaštite, socijalne zaštite, sigurnosti i drugim područjima kako bismo na najbolji način uz učešće velikog broja građana došli do najboljih mogućih rješenja.

Uvažavajući značaj implementacije Ciljeva održivog razvoja u Bosni i Hercegovini, izražavam naše zadovoljstvo činjenicom da je Tuzlanski kanton izabran kao jedan od tri kantona u Federaciji Bosne i Hercegovine da učestvuje u programu Okvir za realizaciju Ciljeva održivog razvoja kao temelj za održiv i inkluzivan rast u Bosni i Hercegovini, koji finansira Ambasada Švedske, a implementira UNDP u partnerstvu sa

UNICEF-om i UNWomen u BiH. To je svojevrsan nastavak naših prethodnih aktivnosti, s obzirom da su pravci održivog razvoja, reflektovani i u Strategiji razvoja Tuzlanskog kantona 2021-2027. godina, pa možemo reći da Strategija razvoja doprinosi ostvarenju sva tri pravca održivog razvoja i u sektoru ekonomskog, društvenog i infrastrukturnog razvoja, te zaštite životne sredine i okoliša. Osnovni ciljevi i smjernice rada Vlade Tuzlanskog kantona, utemeljeni su upravo na Strategiji razvoja Tuzlanskog kantona, te smo kroz dosadašnju praksu kontinuirano doprinosili provođenju i lokalizaciji Ciljeva održivog razvoja. Shodno tome, izražavam punu spremnost i opredijeljenost Tuzlanskog kantona da svoj rad i djelovanje usmjeri ka održivom razvoju, koji će se ogledati u ravnomjernom ekonomskom rastu uz zaštitu okoliša i prirodnih resursa te kreiranje pravednog društva i smanjenje nejednakosti koje egzistiraju unutar Kantona.

U proteklom periodu je realizovana saradnja sa sljedećim međunarodnim organizacijama koji su podržavali ili je planirano u budućnosti podržavanje projekata na Tuzlanskom kantonu: Europska Unija; UNDP - Razvojni program Ujedinjenih nacija; Misija OSCE u BiH; UNICEF – Dječiji fond Ujedinjenih nacija ; UN WOMEN – Entitet Ujedinjenih nacija za ravnopravnost spolova i osnaživanje žena; USAID - Američka agencija za međunarodni razvoj ; TIKa - Turska uprava za međunarodnu saradnju i razvoj; Svjetska banka; Evropska banka za obnovu i razvoj (EBRD).

Pored toga, radu Vlade i/ili projektima na Tuzlanskom kantonu su podršku pružala i sljedeća diplomatska predstavništva: Delegacije Europske unije u Bosni i Hercegovini; Ambasada Švicarske; Britanska Ambasada; Ambasada Švedske, Ambasada Turske; Ambasada Sjedinjenih Američkih država; Ambasada Njemačke; Ambasada Francuske; Ambasada Japana; Ambasada Pakistana; Ambasada Rumunije; Ambasada Češke, kao i mnogi drugi.

Aktivnosti su organizovane ili podržane u okviru sljedećih strateških prioritetnih oblasti: Djelotvorna, otvorena i odgovorna javna uprava; Konkurentan poslovni sektor na pravcu zelene tranzicije i digitalne transformacije; Unapređenje i modernizacija obrazovanja i nauke; Razvoj savremenog sistema zdravstvene zaštite; Unapređenje sistema socijalne zaštite i položaja ranjivih grupa stanovništva; Povećanje energetske efikasnosti.

Svim naprijed navedenim međunarodnim organizacijama i diplomatskim predstavništvima i građanima zemalja iz kojih dolaze želim se zahvaliti za dosadašnju

podršku sa ovog mjesta izraziti punu spremnost i opredijeljenost ovog saziva Vlade za nastavak i proširivanje saradnje.

Neću kriti da dijelim vašu zabrinutost za stanje u zdravstvu i obrazovanju zbog neriješenih izazova na relaciji javno i privatno, zbog neefikasnog upravljanja javnim ustanovama, zbog negativnog trenda smanjenja broja učenika i studenata, zbog po ocjenama građana sve lošijega kvaliteta pruženih usluga. Slični izazovi su i u socijalnoj politici gdje se godinama unazad govori o izradi socijalne karte kao osnove za pravednu, efikasnu i izdašniju socijalnu politiku. Od ove godine ćemo pokrenuti procese širokih konsultacija i izradu sektorskih strategija u spomenutim oblastima kako bismo zajedno utvrdili glavne strateške ciljeve razvoja, prioritete i mjere sa jasnim rokovima, nosiocima i resursima za njihovo ostvarenje. Naš glavni fokus će biti na promjenama usmjerenim na podizanje kvalitete usluga u obrazovanju, zdravstvu, socijalnoj zaštiti, a sve u cilju da našim građanima osiguramo viši kvalitet života i ugodno životno okruženje.

Izazova je mnogo ali je i naša opredijeljenosti i odlučnost da se suočimo sa njima velika. Na nama je da se zajedno suočimo sa izazovima i damo svoj maksimalni doprinos, svjesni da će se uspjeh razvoja Tuzlanskog kantona mjeriti ostvarenim rezultatima utemeljenim na korištenju razvojnih potencijala i prevladavanju slabosti i prijetnju bržem rastu. Svako treba da radi svoj posao. To se odnosi i na opoziciju i zaista očekujem da prate svaki korak koji napravimo i da budu snažan korektiv. To nas samo može natjerati da svoj posao radimo što bolje. Ali, svi mi, i pozicija i opozicija, smo u službi građana i zbog toga želim izraziti očekivanja da ćemo biti jedinstveni uvijek onda kada je u pitanju napredak i podizanje kvaliteta i dostojanstva života naših građana.

Dozvolite mi da vam prezentiram aktivnosti po resorima koje su planirane za mandatni period.

Ministarstvo unutrašnjih poslova Tuzlanskog kantona će:

- nastaviti sa aktivnostima na povećanju ukupnog stepena sigurnosti na području Tuzlanskog kantona, čime će se dati doprinos kvalitetnijem životu i poslovnom okruženju svima koji žive, rade ili borave na području Tuzlanskog kantona;
- nastaviti sa materijalno-tehničkim i kadrovskim jačanjem Uprave policije;

- nastaviti sa edukacijom i stručnim usavršavanjem državnih službenika i namještenika;
- nastaviti sa razvojem i modernizacijom jedinstvenog informacionog sistema u oblasti izdavanja i zamjene ličnih dokumenata, vođenja evidencija o prekršajima i naplatama kazni iz oblasti sigurnosti saobraćaja, i dr. Osnovni cilj u ovoj oblasti je unaprijediti funkcionalnost, pouzdanost i sigurnost kako informaciono-telekomunikacionog sistema MUP-a TK i Uprave policije, tako i uspostavljenih komunikacionih sistema na nivou BiH i Federacije BiH;
- pojačanim angažovanjem svih zaposlenika Ministarstva unaprijediti kvalitet i efikasnost u rješavanju zahtjeva građana.
- Izgradnjom, sanacijom i opremanjem objekata policijskih uprava i stanica.

Ministarstvo pravosuđa i uprave će biti fokusirano na:

- prevenciju i borbu protiv korupcije stvaranjem efikasnog normativnog okvira, te kadrovskim i tehničkim jačanjem Ureda za borbu protiv korupcije Tuzlanskog kantona;
- realizaciju Strateškog okvira za reformu javne uprave u Bosni i Hercegovini, koji koordinira Ured za reformu javne uprave uspostavljen pri Kabinetu predsjedavajućeg Vijeća ministara Bosne i Hercegovine;
- doprinos reformi pravosuđa s ciljem povećanja efikasnosti pravosudnog sistema;
- izgradnju neophodnih objekata gradskih/općinskih sudova (Lukavac i Živinice);
- sanacija i opremanje gradskih/općinskih sudova;
- izgradnju, adaptaciju i opremanje objekata za potrebe tužilaštva.

Ministarstvo obrazovanja i nauke će fokusirati na:

- poboljšanje kvaliteta predškolskog odgoja i obrazovanja
- unapređenje kvaliteta osnovnog i srednjeg obrazovanja kroz inoviranje, osavremenjivanje, a po potrebi i izradu novih nastavnih planova i programa;, te uvođenje novih obrazovnih i stručnih profila usklađenih sa sadašnjim i budućim potrebama tržišta rada i visokoškolskih ustanova;
- izgradnju Tehnoloških centara u srednjim školama na području svakog Gada/Općine u Tuzlanskom kantonu po uzoru na MSŠ Gračanica;
- nastavku aktivnosti u vezi kupovine udžbenika učenicima Osnovnih škola i otvaranju Muzičke škole „Čestimir Dušek“

- izradu Strategije razvoja osnovnog i srednjeg obrazovanja Tuzlanskog kantona;
- unapređenje kvalitete visokog obrazovanja kroz stvaranje novog zakonskog i regulatornog okvira;
- izradu studije opravdanosti o osnivanju Ministarstva visokog obrazovanja, nauke i tehnologije;
- Izrada Strategije visokog obrazovanja Tuzlanskog kantona;
- početak izgradnje Kampusu Univerziteta u Tuzli;
- unapređenje razvoja nauke kroz programe podrške, što je već započeto u ovoj godini u kojoj smo izdvajanja za nauku povećali za pet puta;
- Izrada Strategije razvoja nauke i tehnologije Tuzlanskog kantona.

Ministarstvo prostornog uređenja i zaštite okolice će:

- nastaviti sa unapređenjem zaštite okoliša i planskog korištenja prirodnih resursa i prostora;
- raditi na pripremama izrade Prostornog plana Tuzlanskog kantona, obzirom da je postojeći predviđen za period 2005-2025;
- voditi aktivnosti vezano za realizaciju projekata „Energijske efikasnosti 200 javnih objekata“;
- voditi aktivnosti vezano za rekonstrukciju zgrade Vlade, takozvanu zgradu „Soda-So“;
- realizirati sa međunarodnim i domaćim partnerima programe podrške projektima energetske efikasnosti za javna i privatna preduzeća;
- razviti i realizirati ciljane programe podrške unapređenja energetske efikasnosti za objekte u vlasništvu građana Tuzlanskog kantona;
- raditi na uspostavljanju jedinstvenog geoinformacionog sistema na području Kantona, te zaštitu zraka, tla i voda.
- analizu efekata realiziranih programa podrške.

Ministarstvo finansija će:

- efikasno i transparentno upravljati javnim finansijama u cilju ekonomskog razvoja i finansijske sigurnosti Kantona;
- pratiti porezne politike u nadležnosti Kantona;
- finansirati funkcije Kantona, te razvojne i druge fondova;

- raditi na očuvanje finansijske stabilnosti Budžeta TK, njegove likvidnosti i sposobnosti izvršenja značajno unaprijeđenog nivoa socijalnih i boračkih davanja.

Ministarstvo privrede će se fokusirati na:

- razvoj i jačanje konkurentnosti poslovnog sektora Tuzlanskog kantona, zasnovanog na pravcima digitalne transformacije i zelene tranzicije;
- unapređenje poslovnog ambijenta olakšavajući privrednim subjektima da se usmjere ka progresivnom razvoju temeljenom na inovacijama;
- programe podrške unapređenju poslovanja, konkurentnosti i inovativnosti privrednih subjekata sa područja Tuzlanskog kantona;
- programe podrške svim fazama osnivanja i uspostave poslovnih zona;
- programe podrške subjektima poduzetničkih potpornih institucija;
- implementaciju značajnijih projekata u cilju poticanja cjelokupnog razvoja Kantona;
- nastavak implementacije INTERREG projekta „Pametne škole“;
- analizu efekata realiziranih programa podrške razvoju privrede.

Ministarstvo trgovine, turizma i saobraćaja će prioritetno raditi na:

- realizaciju mjera iz Strategije razvoja turizma Tuzlanskog kantona za period 2022-2027 godina i ostvarenje prioriteta i strateških ciljeva iz područja turizma;
- podizanju kvaliteta usluga u trgovini i njihovo usklađivanje sa standardima EU, naročito u zaštiti zdravlja i prava potrošača;
- podizanja kvaliteta proizvoda, njihovog brendiranja i kreiranja prepoznatljivosti, a sve u cilju podizanja konkurentnosti domaćih proizvoda kako na domaćem tako i na stranom tržištu;
- izradi planske dokumentacije JU Direkcija regionalnih cesta TK;
- pripremi dokumentacije za zajedničko djelovanje Vlade i Skupštine Tuzlanskog kantona sa višim nivoima vlasti u realizaciji strateških projekata izgradnje cestovne infrastrukture;
- izgradnji prvih kilometara brze ceste/autoceste na području TK, te modernizacijih postojećih magistralnih/regionalnih pravaca;
- aktivnostima u vezi elektrifikacija glavnih željezničkih pruga na području TK;
- uspostavi Cargo centra, Gate III i parkinga na Međunarodnom aerodromu Tuzla;

- poboljšanje saradnje sa svim nivoima vlasti u FBiH u cilju razvoja saobraćajnih koridora višeg ranga cesta;
- analizu efekata realiziranih programa podrške razvoju turizma.

Ministarstvo poljoprivrede, šumarstva i vodoprivrede će:

- intenzivno raditi na unapređenju upravljanja prirodnim resursima radi ostvarivanja proizvodnje kvalitetnih i konkurentnih poljoprivrednih proizvoda
- raditi na poboljšanje stanja postojeće vodne infrastrukture te uspostavljanju ekološki prihvatljivog i održivog upravljanja šumama i šumskim zemljištem;
- završiti sanaciju brane i započinjanje aktivnosti na čišćenju i zaštiti hidro akumulacije Modrac;
- kreirati i realizirati programe poticaja primarnoj poljoprivrednoj proizvodnji;
- kreirati i realizirati programe podrške organizatorima proizvodnje u kooperaciji otkupa proizvoda iz kooperacije i prodaje tih proizvoda;
- kreirati i realizirati programe poticaja ekološke proizvodnje, kapitalnih investicija u primarnoj poljoprivrednoj proizvodnji i prehrambenoj industriji;
- regresirati kamate na investicijske kredite u primarnoj poljoprivrednoj proizvodnji i prehrambenoj industriji i kredite za otkup viškova biljnih i animalnih poljoprivrednih proizvoda na području Tuzlanskog kantona;
- kreirati i realizirati programe podrške stručnim institucijama, participacije u realizaciji projekata novih tehnologija od interesa za primarnu poljoprivrednu proizvodnju;
- programe podrške ruralnom razvoju;
- analizu efekata realiziranih programa podrške razvoju poljoprivrede i ruralnom razvoju.

Ministarstvo zdravstva će biti fokusirano na sljedeće:

- izraditi Strategiju zdravstva Tuzlanskog kantona;
- nastaviti aktivnosti na unapređenju i prevenciju zdravstvenog stanja stanovništva;
- omogućiti realizaciju mjera za osiguranje i provođenje zdravstvene zaštite od interesa za Tuzlanski kanton, koje direktno ili indirektno utiču na zdravlje, kao i mjere unapređenja zdravstvene zaštite i javnog zdravstva;
- nasataviti sa materijalno-tehničkim opremanjem zdravstvenih ustanova;

- posebno posvetiti pažnju za Uspostavu Centra urgentne medicine pri JZU UKC Tuzla, pokretanju procedura za nabavku mobilnog mamografa i procedure za uređenje akušerske klinike na JZU UKC Tuzla (apartmani za porodilje);
- izraditi Studiju opravdanosti izgradnje Bolnice u Živinicama;
- realizirati opremanje Službe medicinske pomoći JZU UKC Tuzla u koordinaciji sa Civilnom zaštitom TK;
- ukidanje premije zdravstvenog osiguranja (takozvane markice).

Ministarstvo za rad, socijalnu politiku i povratak će svoje aktivnosti usmjeriti ka sljedećem:

- Ministarstvo će u oblasti socijalne zaštite biti opredijeljeno da se u što većoj mjeri obezbijedi dostupnost i ujednačenost u ostvarivanju svih prava iz oblasti socijalne zaštite, zaštite civilnih žrtava rata i zaštite porodice sa djecom, prava koja su već regulisana federalnim i kantonalnim zakonom iz ovih oblasti;
- intenzivnije raditi na populacijkoj politici i izradi socijalne karte;
- u oblasti povratka aktivnosti Ministarstva će biti usmjerene na realizaciju programa, koji će povratnicima omogućiti siguran ostanak nakon njihovog povratka na prijeratna prebivališta, a raseljenim licima omogućiti povratak ili siguran i dostojanstven boravak u sadašnjem mjestu prebivališta;
- pružiti podršku novootvorenom Centru za starija lica „Hatidža Mehmedović“ u Potočarima, namjenjenom prvenstveno za smještaj majki Srebrenice;
- Ministarstvo će nastaviti sa aktivnostima i u 2023. godini za isplatu naknade porodiljama u prošlogodišnje iznosu, kao i aktivnostima u vezi jednokratne pomoći penzionerima;
- Otvorenje JU Centra za autizam „Meho Sadiković“;
- analizu efekata realiziranih programa podrške korisnicima socijalne zaštite i povratnicima.

Ministarstvo za kulturu, sport i mlade će biti fokusirano na:

- ključni fokus će staviti na unapređenje uslova za razvoj djelatnosti kulture, zaštitu i korištenje kulturno-historijskog naslijeđa, razvoj i bavljenje sportom, unapređenje politika prema mladima te provedbu strategije prema mladima
- na realizaciju programa subvencioniranje kamata na kredite za stambeno zbrinjavanje mladih;

- realizaciju programa subvencioniranje troškova mladima za smještaj i boravak djece u predškolskim ustanovama;
- finansiranje i sufinansiranje projekata omladinskih udruženja;
- realizaciju mjera iz Strategije prema mladima Tuzlanskog kantona za period 2020-2024;
- analizu efekata realiziranih programa podrške razvoju kulture, sporta i podrške mladima.

Ministarstvo za boračka pitanja će biti fokusirano na:

- donošenje novih i predlaganje izmjena i dopuna postojećih zakona i drugih propisa;
- nastaviti zaštitu i poboljšanje položaja prava boraca i članova njihovih porodica, a što se posebno odnosi na provođenje utvrđenih dopunskih prava, sa posebnim akcentom na osiguranje zdravstvene zaštite, obrazovanje, školovanje i zapošljavanje, kao i socijalno zbrinjavanje istih, uvođenje u pravo na egzistencijalnu naknadu supruga umrlih boraca;
- realizirati programe podrške utemeljenim na Zakonu o dopunskim pravima branilaca i članova njihovih porodica a u skladu sa pravilnicima za svaki pojedinačni program podrške;
- analizu efekata realiziranih programa podrške.

Dame i gospodo,

Navedeni ekspozice se može predstaviti i u sažetom obliku kroz niz mjera koje se objektivno mogu realizovati u četvorogodišnjem periodu. Ja vam čvrsto obećavam da će Vlada dati svoj maksimum, a uvažene članove Skupštine TK molim za podršku u svim fazama njihove realizacije.

Radi se o sljedećim konkretnim ciljevima i projektima:

1. Početak izgradnje Kampusu Univerziteta u Tuzli,
2. Uspostava Centra urgentne medicine pri JZU UKC Tuzla,
3. Energetska efikasnost/utopljanje 200 javnih objekata na području TK,
4. Rekonstrukcija zgrade Vlade TK,

5. Izgradnja prvih kilometara brze ceste/autoceste na području TK, te modernizacija postojećih magistralnih/regionalnih pravaca,
6. Elektrifikacija glavnih željezničkih pruga na području TK,
7. Cargo saobraćaj na Međunarodnom aerodromu Tuzla,
8. Završetak sanacije brane i započinjanje aktivnosti na čišćenju i zaštiti hidroakumulacije Modrac,
9. Formiranje naučno-tehnoloških parkova u Tuzli i Živinicama
10. Regulacija korita rijeka Spreče i Tinje,
11. Izgradnja objekata predškolskog obrazovanja u Sapni i Teočaku,
12. Izgradnja objekta Policijske uprave Živinice,
13. Izgradnja objekta Policijske uprave Tuzla (zgrada tužilaštva),
14. Izgradnja objekta Općinskog Suda u Lukavcu,
15. Izrada socijalne karte i populacijske politike Tuzlanskog kantona.

Također, iznijeću vam i kratkoročne mjere i aktivnosti koje smo zajedno sa vama planirali realizovati u tekućoj 2023. godini, a to su:

1. Pokretanje procedure za nabavku mobilnog mamografa;
2. Ukidanje plaćanja premije zdravstvenog osiguranja;
3. Pokretanje procedure za uređenje akušerske klinike na JZU UKC Tuzla (apartmani za porodilje);
4. Nastavak mjera iz prethodne godine:
 - materijalno-tehničko i kadrovskog jačanja Uprave policije,
 - isplata naknade porodiljama – 996.00 KM,
 - jednokratna pomoć penzionerima – 100,00 KM,
 - besplatni udžbenici za sve osnovce;
5. Otvaranje i puštanje u funkciju objekata:
 - Centar za autizam “Meho Sadiković” Tuzla,
 - Muzička škola “Čestmir Dušek” Tuzla,
 - Gate III/Parking na Međunarodnom aerodromu Tuzla;
6. Poboljšanje statusa boračke populacije: Usklađivanje zakona i uvođenje u pravo na egzistencijalnu naknadu supruga umrlih boraca;
7. Maturalni poklon za uspješan kraj i novi početak: Jednokratna novčana pomoć maturantima radi pripreme za maturu;

8. Ulaganje u nauku: Podrška naučno-istraživačkom radu - 1 milion KM;
9. Kapitalni projekti:
 - PU Živinice (kupovina zemljišta i projektovanje),
 - PU Tuzla (kupovina objekta i projektna dokumentacija),
 - Zgrada Vlade (izrada glavnog projekta),
 - Kampus UNTZ (projektna dokumentacija i projektovanje),
 - Sud u Lukavcu (izrada glavnog projekta) i
 - Urgentni centar pri UKC (sredstva za projektnu dokumentaciju);
10. Ured za borbu protiv korupcije: Izrada i stavljanje u funkciju Registra podataka o nositeljima javnih funkcija i imovini u Tuzlanskom kantonu.

Poštovane zastupnice i zastupnici Skupštine Tuzlanskog kantona,

Na osnovu prezentiranog ekspoeza i predloženog sastava Vlade Tuzlanskog kantona, želim vas zamoliti za podršku i pozvati da zajedničkim radom doprinesemo ostvarenju zacrtanih programskih ciljeva i zadataka te tako doprinesemo stabilizaciji i progresu razvoja Tuzlanskog kantona.

Hvala Vam,

U Tuzli, 22.03.2023. godine

Premijer Tuzlanskog kantona

Irfan Halilagić, dipl.pravnik

Zadovoljstvo mi je istaći da je ovim prijedlogom sastava Vlade TK u potpunosti ispoštovana tražena ustavna struktura vezana za nacionalni sastav, kao i ravnopravnost spolova, te tako u sastavu Vlade TK imamo četiri žene i devet muškaraca.

Dozvolite mi da na kraju izlaganja predložim članove Vlade i zatražim podršku za sastav buduće Vlade:

1. Kandidat za ministra unutrašnjih poslova:
Hajrudin Mehanović, profesor islamske vjeronauke
2. Kandidat za ministra pravosuđa i uprave:
Nataša Marošević, Bachelor prava
3. Kandidat za ministra obrazovanja i nauke:
Ahmed Omerović, profesor sociologije
4. Kandidat za ministra prostornog uređenja i zaštite okolice:
Anela Ajšić, Bachelor – inženjer građevinarstva
5. Kandidat za ministra finansija:
Suad Mustajbašić, diplomirani ekonomista
6. Kandidat za ministra za kulturu, sport i mlade:
Damir Gazdić, diplomirani pedagog – psiholog
7. Kandidat za ministra trgovine, turizma i saobraćaja:
Denis Bećirović, Bachelor – inženjer mašinstva
8. Kandidat za ministra zdravstva:
Dužanka Bećirović, doktor medicine
9. Kandidat za ministra za rad, socijalnu politiku i povratak:
Fadil Alić, diplomirani historičar
10. Kandidat za ministra privrede:
Edin Duraković, diplomirani pravnik
11. Kandidat za ministra za boračka pitanja:
Senada Dizdarević, diplomirani pravnik
12. Kandidat za ministra poljoprivrede, šumarstva i vodoprivrede:
Fedahija Ahmetović, profesor razredne nastave